

Aningaasatigut peqquserluutinik malunnarunnaarsaaneq aamma peqqarniisaarniarnermut aningaasalersuineq pitsaaliorniarlugit pineqaatissiissutit pillugit inatsisini (aningaasatigut peqquserluutinik malunnarunnaarsaaneq pillugu inatsit) inatsisit assigiinngitsut aalajangersagaanni, Kalaallit nunaani ataatsimut peqqussummik Kalaallit Nunaanni Namminersorlutik Oqartussat atulersitsinerat pillugu Inatsisartunut aalajangiiffigisassatut siunnersuut
(Aningaasaqarnermut Akileraartarnermullu Naalakkersuisoq)

Saqqummiussissut

Siullermeerinnineq

Matumuuna Naalakkersuisut sinnerlugit inatsisit assigiinngitsut aalajangersagaasa, Kalaallit Nunaani ataatsimut peqqussummik Kalaallit Nunaanni aningaasatigut peqquserluutinik malunnarunnaarsaaneq aamma peqqarniisaarniarnermut aningaasalersuineq pitsaaliorniarlugit pineqaatissiissutit pillugit inatsisinut, aamma aningaasanik peqquserluutinik malunnaarunnaarsaasarneq pillugu inatsisitut taaneqartartumut siunnersuut saqqummiuppara.

Siunnersuutikkut qallunaat inatsisaannik allannguinerit arlallit, aningaasatigut peqquserluutinik malunnarunnaarsaaneq pillugu inatsimmut allannguutinik imaqartut Kalaallit Nunaanni atortussanngortinneqassapput. Kalaallit Nunaanni inatsisit nunatsinni pissutsit aallaavigalugit nunat tamat aalajangersagaannut naapertuuttunngortinnissaasa qularnaarnissaat, aalajangiiffigisassatut siunnersuummi siunertaavoq.

Taamaalilluni siunnersuutikkut malittarisassat aningaasanik peqquserluutinik malunnarunnaarsaasarnermut suliniutinik nukittorsaaqataassapput.

Peqqussutikkut nunanit allanit kortit akiliutit siumut akileriikkat kinaassutsimik isertuussisut akiliutigisinnaanerannut inerteqqutip atulersinneqarnera ilaatigut taaneqarsinnaavoq.

Taakku saniatigut qarasaasiami aningaasalianik nioqquteqartut pilersitsisartullu aningaasatigut peqquserluutinik malunnarunnaarsaaneq pillugu inatsimmi peqqussummut ilaalersinneqarput. Aammattaaq aningaasalersuisarnermi sullissisut qarasaasiami aningaasalianik atulersitsinermit attuumassuteqartut aningaasatigut peqquserluutinik malunnarunnaarsaaneq pillugu inatsimmut ilaatinneqalerput, taamaalillutillu sullitanik ilisarismanninnissamik, misissuisussaataanermit, nalunaaruteqartussaataanermit il.il. periutsit pillugit malittarisassanut ilanngunneqarlutik.

Peqqussutip aningaasanik tigusassanik taaneqartup 50.000 kr.-nit 15.000 kr.-nut sukaterneqarnera ilaatigut nassatarissavaa.

Aningaasanik tigusassanik killiliusseq namminersorlutik inuussutissarsiortut aningaasanik peqquserluutinik malunnarunnaarsaasarnermut inatsimmi sullitanik ilisarisimanninnissamut immikkut aalajangersakkanut ilaatinneqanngitsut, aningaasanik akiliutinik qanoq annertutigisunik tigusisinnaanerannik killiliussamik aalajangersaavoq.

Aningaasanik tigusassanik killiliusseq tusarniaareernerup kingorna 20.000 kr.-nit 15.000 kr.-nut allanngortinneqarpoq. Tamanna piffissap tusarniaaffiusup kingorna Danmarkimi aningaasanik tigusassanik killiliusseq nutaap atulerneranik patsiseqarpoq. Tassunga atatillugu Kalaallit Nunaanni aningaasanik tigusassanik killiliusseq Danmarkimisulli annertussuseqarnissaa naapertuuttutut isigineqarpoq, taamaammallu killiliusseq nutaap sapinngisamik piaarnerpaamik atulersinneqarnissaa siunniunneqarpoq.

Taama oqaaseqarlunga siunnersuut Inatsisartunut suliassanngortippara.